

Dilemo tse 48 tjhankaneng ka lebaka la ho qhekanyetsa balefalekgetho

Tshwane, 24 Phato 2021 – Monna ya qhekanyeditseng balefalekgetho ba bangata, Khathutshelo Mashau o ahloletswe ho hlola tjhankaneng nako ya dilemo tse 48 ka mora ho fumanwa a le molato diqosong tsa boshodu, boqhekanyetsi le ho tlola molao o mabapi le Thibelo ya Bonokwane bo Hlophisitsweng (POCA).

Makgistrata wa Lekgotla la mane Boksburg o utlwile ka moo SARS e ileng ya fumana tletlebo ho tswa ho molefalekgetho ya hore pusetso ya hae ya lekgetho la lekeno e lefilwe akhaontong e fosahetseng ya banka. SARS e ile ya etsa diphuputso mme ya fumana hore pusetso eo e ile ya leshwa akhaontong ya FNB e lebitsong la Khathutshelo Mashau.

Ho ile ha fumanwa hape hore ke dipusetso tse ngata tse ding tsa balefalekgetho ba bang tse ileng tsa leshwa hona akhaontong ena. Balefalekgetho bana ba ileng ba angwa ke sena ba ile ba hana hore ba tseba ka akhaonto ena ya FNB e fumaneng dipusetso. Ba ile ba boela ba supa hore bona ha ba soka ba kopa hore lesedi la bona le diakhaonto tsa bona tsa dibanka di fetohela ho Khathutshelo Mashau.

Mashau o ne a boetse a na la le akhaonto e nngwe mane Capitec moo hape dipusetso tse ding tsa boqhekanyetsi di neng di leshwa teng. Ha ho tjhelete e ileng ya fumanwa hape ka ha ditjhelete tsohle di ile tsa hulwa ka nako eo diphuputso tsena di neng di qala.

Khomishenara ya SARS Edward Kieswetter o lemositse balefalekgetho ho sebedisa ditsebi tsa lekgetho tse ngodisitsweng feela ho ba thusa ka merero ya bona ya lekgetho.

“Batho ba se nang mangolo a tsa lekgetho mme ba tshepisa balefalekgetho dipusetso tse kgolo, hangata ke batho ba etsang diketso tsa boqhekanyetsi tse qetellang di utlwisitse balefalekgetho bohloko. Balefalekgetho ba tlameha ho tlaleha batho ba jwalo hanghang hore ho tle ho sireletswe balefalekgetho ba bang dinokwaneng tsena.

“SARS e hlakisetsa balefalekgetho le ho ba neha bonnete mabapi le dikanele tseo ba ka di sebedisang ho buisana le yona mme tsona ke tsona feela tseo ba ka di sebedisang. Ebang dikanale tse di sa lekana ho ka tobana le ditlhoko tsa molefalekgetho, ba lokela ho sebedisa ditshebeletso tsa setsebi se ananetsweng sa lekgetho,” ho rialo Khomishenara Kieswetter.

Ho tlaleha diketsahalo dife kapa dife tse belaetsang tse mabapi le boqhekanyetsi ba lekgetho, balefalekgetho ba ka sebedisa SARS Anti-fraud Hotline 0800 00 2870.